

TIGULAARIFFIGISAQ

Kalaallit Nunaannut ministereqarfiup nalunaarutaa nr. 99 21. marts 1984-imeersoq

12. juni 1996 tikillugu allannguutit ilanngullugit

Kapitali 7

Eqqartuussutit naammassineqarnerat il.il.

A. Saqitsaannernik suliassat

§ 1. Pinngitsaaliinikkut naammassisitsiniartoqarsinnaavoq makku tunngavigalugit:

- 1) Eqqartuussutit aalajangiinerillu Kalaallit Nunaanni eqqartuussisunit Kalaallit Nunaanniluunniit pisortanit allanit aalajangiineri inatsisit naapertorlugit pinngitsaaliinikkut naammassitinniarneqarsinaasunit aalajangikkat.
- 2) Isumaqatigiinnerit pisortanut nr. 1-imi taaneqartunut akuerisat, isumaqatigiinnerillu aappariilernissamik aappariikkunnaarnissamillu Kalaallit Nunaannut inatsit naapertorlugu aalajangersagassat oqaloqatigiissutigineqarneranni akuerisat.
- 3) Eqqartuussutit aalajangiinerillu Danmark-imi eqqartuussisunit Danmark-imiluunniit pisortanit aalajangiineri pinngitsaaliinikkut Danmark-imi naammassitinniarneqarsinnaasunit aalajangikkat, imaluunniit isumaqatigiinnerit pisortanut taakkununga akuerisat.
- 4) Qularnaveerusiinermik uppersaasat, taamaatorli inuisa nammineq imminnut qularnaveerusiinermut uppersaasiussaasa aningaasanullu amerlanerpaasussanut qularnaveerusiinermik uppersaasat tungaasigut akiitsut amerlassusiat piffissallu akiliiffissap nallernera akiligassalimmit akuerineqaraangata imaluunniit pissutsinit avatangiisinit erseqqilluaraangata aatsaat.

Stk. 2. Aammattaq pisassarisat makku pillugit pinngitsaaliinikkut naammassisitsiniartoqarsinnaavoq:

- 1) Pigisanik aalaakkaasunik pigisanilluunniit tiguinnaanik qularnaveeqquserlugit pisortanit taarsigassarsiat taakkualuunniit erniaasa akilernerqarnisaannik piumasaqaatit.
- 2) Ininik attartornerup akiinik aammalu kiassaasat, innaallagissap sarfaata, erngup eqqagassallu akissaannik pisortat piumasaat.
- 3) Kalaallit Nunaanni inatsisit naapertorlugit pisortanut akileraarutit akitsuutillu.
- 4) Pilersuinermit akilersuutissiissutaasut Kalaallit Nunaanni qullersat arlaannit aalajangersarneqarsimasut.
- 5) Akilersuutissiissutaasut danskini qullersanit aalajangersarneqarsimasut, kiisalu akileraarutininik akitsuutinillu akileeqqusissutit Danmark-imi pinngitsaaliinikkut naammassisinniarneqarsinnaasut.
- 6) § 14 malillugu aningaasat taarsiiffiginnissutissat.

Stk. 3. Pisassarisaq aammattaaq pinngitsaaliinikkut naammassisinniarneqarsinnaavoq, tamanna suliassaqarfiit, Namminersornerullutik Oqartussanut atasuusut, pillugit inatsisartut inatsisaatigut imaluunniit inatsisartut peqqussutaatigut aalajangersarneqarsimappat.

Stk. 4. Landsdommer-ip akuerisinnaavaa piumasat allat Danmark-imi pinngitsaaliinikkut naammassitinniagassanngortinneqarsinnaasut naammassitinniarneqarsinaassasut.

§ 2. Eqqartuussutit naammassitinniarneqarsinaapput piffissaq nangititsivissaq tak. kapitali 6, § 5, stk. 1, aamma § 12, stk. 1 naagaangat suli nangitassanngortitsineqanngitsaq, piffissamik sivikinnerusumik sivisunerusumilluunniit eqqartuussutip naammassitinneqarfissaanik eqqartuussummi immikkut aalajangigaqanngikkaangat.

Stk. 2. Piffissap eqqartuussutip naammassitinneqarfissaata naanerata kingornatigut eqqar-tuussut nangitassanngortinneqarpat eqqartuussutip naammassitinneqarnissaata kinguartinnisaanik landsdommeri aalajangiisnaavoq.

§ 3. Aalajangiinerit erniinnaq naammassitinneqarsinnaapput aalajangiinnermi tassani allamik aalajangigaqanngippat.

§ 4. Isumaqtigiinnerit § 1, stk. 1, nr. 2-mi, taaneqartut naammassitinneqarsinnaapput piumasarineqartup akilernerqartussanngornerani isumaqtigiinnermi tassani allamik aalajangigaqanngippat.

§ 5. Qularnaveerusiinermik uppersaasat § 1, stk. 1, nr. 4-mi, taaneqartut tunngavigalugit naammassininnissamut piffissarititaq ullormit akiliutissap akileqquneqarsinnaalerfianiit ullut 14-iussapput qularnaveerusiinermik uppersaasami allamik aalajangigaqanngippat. Taamaattorli naammassininnissamut piffissarititaq ulluinnarnit sisamanit sivikinnerusumik isumaqtigiissutigineqarsinnaanngilaq.

Pigisanik qularnaveerutissanngorlugit arsaarinnittarneq

§ 6. Aningaasanik piumasarineqartunik pinngitsaaliinikkut naammassisitsinissaq pisarsinnaavoq akiligassallip pigisaanik nalilinnik qularnaveerutissanngorlugit arsaarinninnikkut.

Stk. 2. Eqqartuussutit naammassisitsiniartartup taamaalilluni:

- 1) Pisassalik aningaasanik akiligassallip pigisaanik atuisussanngortissinnaavaa.
- 2) Pisassalik aningaasanik akiligassallip pisassareriigaanik, sulinermut akissarsiassat akilernerqartussanngoreersut ilanngullugit, pisassaqalersissinnaavaa.
- 3) Pigisat uninngavissut pinngitsaaliinikkut tuniniarneqarnissaat siunertaralugu arsaarinnissutigisinaavai.
- 4) Pigisat tiguinnaat pigisalluunniit allat pinngitsaaliinikkut tuniniarneqarnissaat siunertaralugu qularnaveerutissat arsaarinnissutigisinaavai piumasarineqarneratigullu akiligassalik arsaarinnissutaasumik atuisussaajunnaarsissinnaallugu. Tuniniaanissaq siusinnerpaamik pisinnaavoq arsaarinnineq sapaatip akunnerinik sisamanik kingoqullugu.

Stk. 3. Piumasaqaatit pigisami nalilimmi ataatsimi qularnaveeqqutitallit arlaqartillugit taakkua qanoq tulleriinneqarnisaanni aalajangiisuusassaaq pigisamik pineqartumik arsaarinninnissamik qinnutigisat,

taamaattoq tak. stk. 4, qanoq innikkut tunniunneqarsimanersut, piumasaqaatit ilaata ataatsip arlalilluunniit salliutitassanngortinneqarsimaneratigut allatut ittumik tulleriinnilersuineqarsimanngippat.

Stk. 4. Pigisaq nalilik ataaseq eqqartuussutininik naammassisitsiniartartunit assigiingitsunit arlalinnit arsaarinnissutiginiarneqaraangat arsaarinninniartut tulleriisinneqartassapput arsaarinninnerup qanoq innikkut pinera aalajangiisuutillugu.

Stk. 5. Stk. 3-mi 4-milu maleruaqqusat atussanngillat pigisanik uninngavissunik, umiarsuarnik timmisartunillu piginnittussaanerit allattugaanissaannik inatsisit allanik kinguneqarnerisa taamaaqqataannik.

§ 7. Pisassalik pisassamik pigisanut akiitsoqarnermut uppersaammut tunngassuteqartumik pisassanngortitaassaaq akiitsoqarnermut uppersaamat taanna pisassalimmut tunniunneqarpat imaluunniit eqqartuussutininik naammassisitsiniartartumit paarisassanngorlugu tiguneqarsimappat. Pisassarisani allani pisassanngortitsineq pisassaaq akiligassallip piumasarineqartoq naa-pertorlugu peqquneqarneratigut akiliutissat tamakkerlugit ilaannakorlugilluunniit piumasaqartumut akilertaqqullugit.

§ 8. Akiligassalik aningaasanik illup pigisakitsup taassumalu inoqutaasa pissakilliorlutik inuussutissaqarnissaasa napatinnissaannut pisariaqarsorineqartunik arsaarneqartariaqanngilaq.

Stk. 2. Pigisanik tiguinnaanik qularnaveerutissanik arsaarinninnermi eqqartuussutininik naammassisitsiniartartup aalajangersinnaavaa arsaarinnissutissamik akiligassalik arsaarneqartariaqanngitsoq taanna akilersuinissamik aaqqissuussinermik eqqartuussutininik naammassisitsiniartartup aalajangigaanik akiligassallillu akuerisaanik eqqortitsisillugu. Pisassalik akuersinngippat akilersuinissamik aaqqissuussinerup sivissussusiata ukioq ataaseq akimorsinnaanngilaa.

Stk. 3. Eqqartuussutininik naammassisitsiniartartup aalajangersinnaavaa pigisamik uninngavissumik akiligassallip ilaqutaasaluunniit illutut atugaannik qularnaveerutissamik arsaarinninneq pigisamik taassuminnga pinngitsaaliinikkut tuniniagassanngortitsisuusinnaanngitsoq akiligassalik akilersuinissamik aaqqissuussinermik eqqartuussutininik naammassisitsiniartartup aalajangigaanik akiligassallillu akuerisaanik eqqortitsisillugu.

Stk. 4. Stk. 2-mi 3-milu aalajangersakkat arsaarinnissutissaq qularnaveerusiullugu qularnaveerusiinermik uppersaamat tunngavigalugu arsaarinninnissami atussanngilaq.

§ 9. Pigisap uninngavissup pinngitsaaliinikkut tuniniarnissaanik piumasaqaammik takkuttoqar-pat akiligassallip atuisuujumaartullu tuniniakkamik soqtiginnittut pigisamik taassuminnga misissuisinnaatissavaat. Eqqartuussutininik naammassisitsiniartartoq inummik toqqaasinnaavoq pigisamik nakkutiginnittussamik takutitsisartussamillu.

§ 10. Akiligassalik pigisami uninngavissumi pinngitsaaliinikut tuniniaanermi tuniniakkami najugaqarpat eqqartuussutininik naammassisitsiniartartup akiligassalik akuerisinnaavaa pigisami tassani naapertuuttumik sivissussusissalimmik najugaqaannarsinnaaneramik, taamaattorli tuniniarnissaanut patsisissaatitat aalajangerneqarneranniit qaamatit qulaaluat akimornagit. Akiligassallip attartornerminut qanoq akiliteqarnissaa eqqartuussutininik naammassisitsiniartartup aalajangissavaa.

§ 11. Pigisamit pisassarititaasut pinngitsaaliinikkut tuniniaanermi matussutissalerneqanngitsoortussat atorunnaassapput tuniniaanermi patsisissaatitaasut pisisup eqqortippagit.

Stk. 2. Qularnaveerusiussamik arsaarinnissumilluunniit pisassallip pinngitsaaliinikkut tuniniaanermi pigisamik tamakkiisumik matusissunneqaatiginngisaminik akilimmik pisup pisassami

sinneri nammineq piumasaqaatimisut akiligassalimmut allanulluunniit akileqquniassappagit eqqartuussisut piumasaat taakku millisissinnaavaat aningaasat tigusissutit piffissap tigusiffiusup nalaani pigisap nalinganut naleqqutinngissutaasa pigisap kingusinnerusukkut tunineqarnerani allatulluunniit taarsiiffigineqarnerisa taamaaqqataannik.

Akissarsiassanik akiliutissanillu allanik ilanngartuineq

§ 12. Aningaasanik, akiitsullip pisasaanik, akiliinermi ilanngartuinikkut aningaasatigut piumasaqaatit pinngitsaaliinikkut naammassisinniarneqarsinnaapput pisassanut § 1, imm. 2, nr. 1-, 2-, 4-, 5- aamma 6-imit pineqartunut tunngatillugu, kiisalu tamanna suliaassarfiit, Namminersornerullutik Oqartussanut atasuusut, pillugit inatsisartut inatsisaatigut imaluunniit inatsisartut peqqussutaatigut aalajannersarneqarsimagaangat.

Stk. 2. Akileraarutip tigoreertakkap ilanngaatigereerneratigut akiligassallip pisassaasa aggornerisa pingajuannit annerusumik sukkulluunniit ilanngartuisoqarsinnaanngilaq.

Stk. 3. Piumasat arlallit pissutigalugit ilanngartuineqassagaangat aningaasat ilanngartuutigisat agguaneqartassapput eqqartuussutinik naammassisitsiniartartup erseqqinnerusumik aalajangiinera malillugu. Inuinnaat pilersuinermit akilersuutinik piumasaat siulliullugit naammassissunneqartassapput. Allatigut agguaneqassagaangat eqqartuussutinik naammassisitsiniartartup aalajangersinnaavaa piumasarisat akiitsugalimmut taassumaluunniit inoqutaanut pingaaruteqarluartut salliutillugit naammassissunniarneqartassasut.

Stk. 4. Kalaallit Nunaanni akileraarutinik akitsuutinillu piumasanik naammassissussiniarnermi tamakkuninnga inatsisini immikkut ittuni aalajangersakkat atortuussapput.

§ 13. Pilersuinermit akilersuutit ilanngartuinikkut akilersinniarsinnaatitaanerit atorunnaartassaaq tamatuminnga piumasaqarneq imaluunniit akilersuutit ataatsit siumoorlugit tunniunneqarnissaannik maleruaqqusat tamatumani atortuusut malillugit piumasaqarneq akilersuutit akilernerqartussanngorneranniit ukioq ataaseq tikittinnagu saqqummiunneqanngikkaangata.

Stk. 2. Piumasanut ukiunut tallimanit sivisunerusumik akilernerqartussaareersimasunut ilanngartuusiisoqarsinnaanngilaq.

§ 14. Kinaluunniit ilanngartuusiinissamik peqquneqartoq peqquneqarneq taanna naalanneqanngippat taarsiiffiginnittussaataaassaaq. Aningaasat taarsiiffiginnissutissat kapitalimi uvani maleruaqqusat malillugit akilersinniarneqarsinnaapput, tak. § 1, stk. 2, nr. 6.

Piumasanik allanik aningaasaanngitsunik pinngitsaaliinikkut naammassinninnissaq

§ 15. Kialuunniit pigisap uninngavissoq qimattussaappagu pigisarluunniit aalajangersimasooq tunniuttussaappagu eqqartuussutinik naammassisitsiniartartup piumasarineqartoq tunngavigalugu pisussaataaneq taanna ajornanngippat pinngitsaaliissutigalugu naalattinniassavaa pisisaatitaasup pisussaataajunnaarsinneratigut pigisamilluunniit arsaagaaneratigut. Allakkiamik uppersaatissamik atsiugassaqarpat tamatuma qinnutigineqarneratigut eqqartuussutinik naammassisitsiniartartup atsiugassaq taanna atsiussavaa.

§ 16. Kinaluunniit aningaasaanngitsumik allamik akileeqquneqarpat eqqartuussutinillu naammassisitsiniartartup piumasarineqartoq taanna § 15-imi maleruaqqusat malillugit naammassitissinnaanngikkuniuk eqqartuussutinik naammassisitsiniartartup suliaasaq kredsret-imut

suliassanngortissavaa. Eqqartuussisut pisassallip naammassinninnissami soqutigisaa aningaasannngortissinnaavaat akuerisinnaalluguluunniit pisussaataasup suliarinissaanut pisussaataassutaa pisassallip suliarissagaa suliaritissagaaluunniit.

Stk. 2. Aningaasat eqqartuussisut stk. 1 malillugu aalajangiinerat naapertorlugu pisassallip pisassariligassai arsaarinninnikkut akilersinniarneqarsinnaapput.

§ 17. Eqqartuussutininik naammassisitsiniartartup piumasarineqartoq tunngavigalugu angajoqqaatut oqartussaannermik najuussinnaatitaanerulluunniit atornerqarnissaanik aalajangersakkat eqqartuussutikut pisut imaluunniit eqqartuussisunit qullersamilluunniit akuerisat naammas-sitittassavai. Naammassinninnissamik pisoqarsinnaanngilaq meeqqap isummamigut timimigulluunniit peqqissusia tamatumuuna navianartorsiortinneqarujussuassappat.

Stk. 2. Eqqartuussutininik naammassisitsiniartartoq angajoqqaatut oqartussaassutsip sinniisuutitaqarnerullu atortinniarnerninut aammalu isumaginninnermut udvalg-ip meeqqat sumi najugaqarnisaat pillugit aalajangiinerisa atortinniarnerninut piumasarineqartoq tunngavigalugu ikiuuttassaaq. *Stk. 1*-imi, oqaaseqatigiit aappaanni, aalajangersagaq taamatut atornerqassaaq.

§ 18. Eqqartuussutininik naammassisitsiniartartup attartortup ineqarnermut akiliummik piffissaq eqqorlugu akiliisannginnera pissutigalugu attartorneq atorunnaarsinneqarpat attartortoq attar-torneqartumit anisissinnaavaa. Aamma taamaassaaq isumaqatigiissut malillugu attartornerup atorunnaarsinneqarnerani. Taamaattorli eqqartuussutininik naammassisitsiniartartup anisitsi-nissamik piumasarineqartoq naalakkumanngissinnaavaa akiligassalik ilaqutaaluunniit illussaarullutik maaniinnarmiittussanngussappata, pissutsillu aamma anisitsinissap siuartinnissaa pisariaqartinngippassuk.

Eqqartuussutininik naammassisitsiniartartut

§ 19. Eqqartuussutininik naammassisitsiniartartut tassaapput politi-t akiligassanillu akiliisitsini-artartut kommunalbestyrelsenit ivertitat allamik aalajangigaqarsimanngikkaangat.

Stk. 2. Politimester-ip inuit politi-tut atorfiluunngitsuttaaq eqqartuussutininik naammassisitsiniarnermi suliassanik politi-t suliarisartagaannik suliaqartussanngortissinnaavai.

Stk. 3. Suliassat pisortanut stk. 1-imi taaneqartunut agguannissaat justitsministeri-mit aalajangerneqassaaq.

Periaasissaq

§ 20. Pinngitsaaliinikkut naammassinninnissamik qinnutigisaaq nunaqarfimmi akiligassallip nunaqarfigisaani najugaaniluunniit eqqartuussutininik naammassisitsiniartartumut tunniunneqassaaq. Akiligassalik Kalaallit Nunaanni nunaqarfeqanngippat najugaqanngippalluunniit pigisamik uninngavissumik pinngitsaaliinikkut naammassinnissuteqarnissamik qinnutigisaaq nunaqarfimmi akiitsugallip pigisaqarfigisaani eqqartuussutininik naammassisitsiniartartumut tunniunneqassaaq.

§ 21. Pinngitsaaliilluni naammassinninniarnissaaq politiuunngitsunit suliarineqassappat politi-t piumaffigineqarlutik pisussaapput suliassat sulissutiginnissaannut eqqartuussutininik naammassisitsiniartartumut pisariaqarneratut ikiuunnissamut.

Stk. 2. Akiligassalik aningaasat tungaasigut pissutsiminik nassuiaateqartussaavoq aggeqqusaaninilu

malillugu eqqartuussutinik naammassisitsiniartartumut orniguttussaalluni. Akiligassalik pissutivimmik pissuteqarnani ornigutinngitsoorpat kapitali 2, § 20 atussaaq.

Stk. 3. Akiligassalik pisinnaatitaavoq pigisat arsaarinnissutigeqqusami takutinnessaanut. Akiligassallip pigisat arsaarinnissutissatut atorsinnaasut takutinngippagit eqqartuussutinik naammassisitsiniartartoq misissuisinnaavoq akiligassallip illuani inuttaaniluunniit pigisanik taamaattunik peqarnersoq.

§ 22. Pinngitsaaliinikkut naammassininnissamut imaaliinnarlugu tunuartinneqarsinnaanngitsumut suliassami peqataasut arlaat inulluunniit alla akerliliippat eqqartuussutinilluunniit naammassisitsiniartartoq isumaqaruni pinngitsaaliinikkut naammassininnissamut tunnga-viusoq tamatuma suliarinissaanut nangaasoorutaasumik qularnaateqartoq piumasarineqartoq itigartissavaa tamannalu kredsret-imut suliassanngortillugu. Suliassaq taanna kapitali 3-mi maleruaqqusat malillugit suliarineqassaaq.

§ 23. Pinngitsaaliinikkut tuniniaanissamik, tamatumuunakkullu pigisat uninngavissut il. il. pinngitsaaliinikkut tuniniarnissaasa landsdommer-ikkoortissinnaaneriniq, maleruaqqusat Justitsministeri-p aalajangersarsinnaavai.

Stk. 2. Justitsministeri-p aalajangersinnaavaa pigisamik uninngavissumik piginnittussaanerit ilisimaneqanngitsut allattugaanngitsut tamanut ammassumik aggersagaasinnaasut piginnittussaanerit pigisap taassuma pinngitsaaliinikkut tuniniarneqannginnerani annaartusaarutaanngitsut annaaneqarnissaannik sunniuteqartussamik.

§ 23 a. Kapitalimi matumani aalajangersakkat killissarititaasa iluanni inatsisinik atortitsinermut ministeri isumaqatiginiareerlugu inatsisartut inatsisaatigut imaluunniit inatsisartut peqqussutaatigut suliassaqarfiit, Namminersornerullutik Oqartussanut atasuusut, pisassaannik akiliisitsiniaasarneq pillugu pisariaqartinneqartutut, ilassutitut aalajangersakkanik aalajangersaasoqarsinnaavoq.

B. Eqqartuussisut aalajangiinerinik naammassinissutissaagallartut

§ 24. Eqqartuussisut aalajangiinerinik naammassinissutissaagallartut pillugit maleruaqqusat Justitsministeri-p aalajangersarsinnaavai.

C. Pinerlunnermik suliassat

§ 25. Eqqartuussummik pinerlunnermik suliassami oqaatigineqartumik akiliisitsissutissanillu akuerisanik arsaarinninnissamilluunniit naammassininnissaq politi-t isumagissavaat.

Stk. 2. Akiliisitsissutit aningaasallu arsaarinnissutit akilersinniarniqarsinnaapput pigisanik qularnaveerutissatut arsaarinninnikkut aamma akissarsiaasanik akiliutissanillu allanik ilanngartuinikkut.

Stk. 3. Innarlisaagaasup piumasaqarneratigut taarsiissutissat suliassap suliarinerani aalajangikkat tiguniarneqarnerini politi-t ikiuuttassapput.

§ 26. Pinerlunnermik suliassami eqqartuussut naammassininnissamut piffissamik immikkut aalajangersakkamik imaqanngippat naammassinneqassaaq eqqartuussut nangitassanngortinneqarnani piffissarititaq kapitali 6, § 17-imi, aalajangigaq naappat aammalu suliassami peqataasut illugiillutik nangititsinissaq asooruppassuk.

Stk. 2. Eqqartuussut nangititsivissamit oqaatigineqartoq eqqartuussut taanna tamatuminnnga immikkut aalajangersakkamik imaqanngippat erniinnaq naammassitinneqassaaq.

Stk. 3. Eqqartuussummik nangitassanngortitsineq immikkut akuerineqarpat, tak. kapitali 6, § 5, stk. 2, aamma § 22, naammassinninnissinnaatitaaneq atorunnaassaaq, naammassinninniarnelut aallartereersoq taava unittinneqartariaqarpoq.

Stk. 4. Aalajangiinerit Danmark-imi naammassitinneqarsinnaasut erniinnaq naammassitinneqarsinnaapput.

§ 27. Pigisat nalillit allat § 25, stk. 2-mi taaneqartuunngitsut akigineqarnissaannik eqqartuussutip isumaqarnerata taamaaqataannik saqitsaannernik suliassani eqqartuussutit naammassitinneqartarnissaannik aalajangersakkat taamatut atussapput.

Inatsisit atuutilissaaq 1. juli 1996.

Tunniunneqarput Christiansborg Slot-imi,

ulloq 12. juni 1996

Kunngiussutitsinnik Atsiorpugut Naqissusiillutalu

MARGRETHE R.

Nassuiaatit

1) § 1, imm. 2, nr. 3-mi aalajangersagaq (ilanngussaq "akitsuutillu") 1. juli 1992-imiit atuutilerpoq. Justitsministerie-p inatsisiliaa nr. 188 23. marts 1992-imeersoq.

2) § 12, imm. 4 (allanguut "akileraarutininik piumasani"-niit "akileraarutininik akitsuutinillu piumasani"-nut) 1. juli 1992-imiit atuutilerpoq. Justitsministerie-p inatsisiliaa nr. 188 23. marts 1992-imeersoq.

3) § 19, imm. 3, § 23, imm. 1 aamma 2, § 24-ilu (allanguut "Kalaallit Nunaannut Ministeri"-miit "Justitsministeri"-mut) 1. juli 1992-imiit atuutilerpoq. Justitsministerie-p inatsisiliaa nr. 188 23. marts 1992-imeersoq.